

che vano, habino la muda im borsa, over non le mandar adesso. Et per il principe con il colegio li fo risposto, andaseno, justa la leze e le parte di pregadi; et cussi anderano a lhorò viazo.

*Item*, si ave una nova che, versso Arzenta, volendo 4 padoani citadini foraussiti venir a la Bastia etc., da li cavalli lizieri di Zuan Forte, condutier nostro, ch' è in quelle parte, fonno asaltati. I qualli, fuzendo, si butono im Po, et si anegono, più presto cha venir in le man di la Signoria nostra. Et per uno zudeo, venuto de li, se intese tal nova, portata a' soi fradelli e parenti, che in questa terra stanno. La nome di qualli sono questi: Livio Buzacharhi, *quondam* domino Zorzi, Zuan Vitaliam, *quondam* domino Zorzi, Nicolò Sanguinazo, et uno fiol di Zuan Baso, da Piove.

423 *Copia de una letera, de sier Piero Loredam, quondam sier Marcho, quondam sier Alviçe, procurator, data al Chajaro, a dì 6 dezembrio 1510, drizata a sier Nicolò e Alviçe Bernardo, quondam sier Piero, da San Polo.*

Come a dì 5 octubrio partissemo di Alexandria, per comandamento dil signor soldam, per de qui, unde a dì 12 zonzessemo a Bulacho, a mezo dì, e a dì 13 da matina fossemo, per i turzimani, menati in castello. Apresentati a sua signoria, feze aprosimar alquanto la magnificencia dil consolo, sier Thomà Contarini, dimandando se mai ad alcun de la nazione, per lui nè precessori soi, era stà fato dispiazer, nè dado morte. Respose sua magnificencia sapientissimamente. Dise: Perchè zerchetu offender el mio regno, mandando lettere al Suffi, et *etiam* ambascadori? Dal Bir mi è stà mandati do franchi, uno turziman de Zipro, l'altro ambascador, havevano lettere di la Signoria, del re de Franza et de altri signori, e del Suffi, i quali dicono esser stà mandati da la Signoria; rebufando con gran parole. Questa fo la prima oposition. A voler dir la risposta, feze el magnifico consolo, seria molto longo, ma a tutto benissimo respose: Questi do homeni preditti, uno è turziman de Zipro, el qual era andato a tuor l'aqua de le chavalete per l'ixola de Cypro; l'altro è uno fante de merchadanti de Alepo, era andato per scuoder danari. La seconda oposition fu, perchè si lassava over si deva in dita ixola a' rodioi intrada; terzio, perchè se deva vituaria a' rodioi e corsari, zoè biscoti et aqua de la predita ixola. Replichò tutte queste cose, e con gram rebufo ne mandò via. Fossemo messi in una caixa a presso el chadi nadrachas, con custodi

de 4 zime; stessemo zorni 17, che mai non ne feze dir cossa alcuna. A dì 31 ne mandò a chiamar. Menati davanti, dimandò quanto tempo era, che li ambascadori del Suffi era stati a Veniexia. E, ditoli del tempo, replichò molte parole ne la prima audientia dita; *tandem* se risolse, che sua magnificencia dovesse scriver a la illustrissima Signoria, se la voleva paxe ho guerra con sua alteza. Rispose sua magnificencia, intender benissimo l'animo de la illustrissima Signoria, qual era de esser continuamente amicha de sua signoria. Fossemo ritornati nel locho primo; e fu scritto la letera, justa l'hordine. El chadi nadrachar la mandò a tuorla, e tenela do zorni; judichamo l'habi mostrata al soldan; poi l'hano ritornata, e non voleno fino qui la se mandi. Da poi la prima audientia, mandò comandamento a Damasco e per tuta la Soria, che li consoli e merchadanti dovessero venir de qui. Fu fato ogni experientia, che ditti comandamenti fosseno revochati; non è stà possibile; non si resta de tentar; partiteno de qui ditti comandamenti a dì 29 octubrio. Havemo ultimamente fato dar uno chaffa al signor soldam, rechiedendo la expeditiom nostra. El signor soldam ne à mandato a dir da più persone, che semo innocenti, e che 'l cognosse nui altri alexandrini non l'haver offexo, nè vol cossa alcuna da nui; ma che *solum* aspetiamo el consolo de Damasco, aziò cognosiamo lui haver offeso sua signoria, e, subito zonto, ne expedirà in bene; si che questa è la opinion dil signor soldam contra de nui, e vostre magnificencie la tegna certo, perchè da più persone questo medemo avemo inteso. Quanto veramente abia a esser de quelli de la Soria, ne son diverse oppinion; intendemo esser stà dà una querella del dito consolo, che 'l se habi impazà in queste cosse del Suffi. Idio, prego, lo expedischa in bene.

Parmi conveniente nararvi el successo de' catalani. Come per mie scrissi, el consolo, con tutti i merchadanti e persone del fontego, forono menati de qui, hanno patido prexon et chadene molti zorni; e se non fusse stà el danaro dia dar ditto consolo, che xe da ducati 55 milia, a persone de autorità, fra i qual al dechieri del soldam da ducati X milia e più, per el qual debito da assai creditori è stà molto favorito, ed àli molto zovato; *nilominus* se hanno obligato, secondo se dize, a condur tuta l'armada prexa, e le robe de' magarbin, prexi su le barze francese, e tutti essi mori in Alexandria: la qual cossa mai la farano, *maxime* de l'armada. Li è stà tolto di doana, per el preditto credito dil soldan ed altri, bote 750 ogij de diversi merchadanti, per for-